

AZPIEGITURAK. Ekimena sostengatzera idazle, musikari eta bertsolari anitz joan zen atzo



JON HERNÁEZ / ARGAZKI PRESS

Durangoko Kafe Antzokiaren aurkezpenak kultur eragile anitz elkartu zituen.

Kultur gabeziak betetzeko asmoz zabalduko dute, abenduan, Kafe Antzokia

Durangoko gunea erreferentziazkoa eta bizia izango dela diote arduradunek

Aitziber Basauri | **DURANGO**

Durangoko Landakosolua auzoan eraikiko dute Kafe Antzokia, besteak beste Durangoko Euskal Liburu eta Disko Azoka ere hartuko duen erakustazokaren alboan. 2003ko abendurako prest edukitzea espero dute, Beñat Gaztelurrutiak Kafe Antzokiko arduradunak azaldu duenez. Hiltegi zaharra zaharberrituak dute; hala ere, eraikin berriak luzeran 4 metro gehiago eta zabaleran 10 metro gehiago izango ditu. Beheko solairuan 650 metro koadro izango ditu —agertoki bat egokituko dute bertan—. Goialdean, berriaz, 250 metro koadroko anfiteatro bat izango du. Bi solairutan banatuta, hiru barra izango ditu. Sotoan egokituko dituzte gainerantzeko zerbitzuak.

Euskal Herriko hainbat kultur eragilek babesa eman diote Durangon eraikiko duten Kafe Antzokiaren proiektuari: Andoni Egaña, Xabier Amuriza, Unai Iturriaga eta Igor Elortza bertsolari eta idazleak, Joseba Tapia, Petti, Mikel Urdangarin, Igor Arzuaga eta Josu Zabala musikariak, Asier Serrano idaz-

le eta musikaria, Rafa Rueda PLT musika taldeko kidea eta Jon Ander Ubeda Bide Ertzean musika taldeko kidea. Guztiek bat egin dute Durangon, Berbaro euskara elkarteak bultzatutako proiektua babesteko. Ekitaldian parte hartzerik izan ez arren, Kafe Antzokiarekin bat egin dute Anje Duhalde, Sor-kun, Anari eta Andoni Tolosa *Morau* musikariak eta Bide Ertzean taldeko kide Imanol Ubedak, Maialen Lujanbio bertsolariak eta Kirmen Uribe idazleak ere.

Jose Tapiak «pozgarria» deritzo proiektua abiatu izanari, «gure lanak agerrarazteko gunea izango da eta». Hala ere, egungo egoera «hoberena» ez dela esan du. «Trikitia jotzen hasi ginenean gabezia nabarmenak zeuden azpiegitura eta baliabideetan; hedabide gutxiago zeuden, besteak beste. Orain areto onak eta asko ditugu, baina, kultur gabeziak daudela uste dut; atzera egin dela sentidu dut». Esan duenez, «ezin gara poztu besterik gabe areto berria sortu delako». Durangoko Kafe Antzokiko proiektuak kultur etxe «gehienek» hartuta-

ko bide bera har ez dezan espero du; hainbat aretotan ekitaldia eratzeko antolatzaileek dirua ordaindu behar dutela dio.

Berbaro ekitaldiak eratzen hasi zeneko garaia gogoratu du Andoni Egañak. «Antolatutako bertso-afari eta saioetan hartu dugu parte. Harrera goxoa eta etxekoa egin izan digute eta antolakuntza ere taxuzkoa izan da beti. Egindako lana eskertzeko da». Proiektuak aurrera egitea espero du Egañak. «Goxo sentitzen garen lekuan alkatzen gara; etxeko sentiarazten gaituzten lekuan. Kafe Antzokia horrela izango dela seguru gaude». Mikel Urdangarinak Durangaldeko kultur eskaintza «aberastuko» duela azaldu du, eta lehenengo kontzertua Berbaro duen tabernan eman zuela gogoratu. «Badakit zenbat oztupo izan dituzten aurrera egiteko, baita Kafe Antzokia aurrera eramateko ere, eta poz handia hartu dut. Zornotzarra izanda, ekarpen handia egingo duela deritzot».

Euskalgintzaren erreferentzia izateko sortua

Euskalgintzaren «erreferentzia» izatea gura dute, Gaztelurrutiak esan duenez. «Gune irekia, erakustazokaren osagarria eta eskualdeko elkarte eta taldeendako erabilgarria. Kultur-

ESANAK

JOSEBA TAPIA

(Musikaria)

«Kultur areto asko eta onak daude; hala ere, kultur gabeziak daudela uste dut, atzera egin dela»

ANDONI EGAÑA

(Bertsolaria)

«Etxeko sentiarazten gaituen lekuetan elkartzen gara; Kafe Antzokian hala izango dela seguru gaude»

MIKEL URDANGARIN

(Musikaria)

«Durangaldeko kultur eskaintza aberastuko duela uste dut; ekarpen handia egingo duela deritzot»

gunea eta astialdirako gunea izango da, espazio bizia eta parte-hartzailea, eta euskaraz lan egingo du». Eskualdeko beste aretoekin batera kultur eskaintza «sendotzea» dute asmo.

Miloi bat euroko inbertsioa egin beharko dute egitasmoa aurrera eramateko. Horretarako, Durangoko Kafe Antzokia S.A. enpresa eratu dute. Horren 200 euroko 5.000 partzipazio jarri dituzte herritarren eskura.

MUSIKA

X. Gitarra Jaialdia egingo da Zarautzen hurrengo astean

Leire Aramendi | **DONOSTIA**

X. Gitarra Jaialdia antolatu dute hurrengo astera-ko Zarauzko Udalak eta Airean Euskal Herriko Gitarra elkarteak.

Kontzertuak, Admira Gitarra lehiaketa eta ikastaroak izango dira aurten ere abenduaren 26tik 30era bitartean egingo diren ekitaldi nagusiak.

Leo Brower eta Eduardo Baranzano gitarristak eta Raul Viela Bellosta 2001eko Admira Gitarra lehiaketaren irabazlea izango dira aurtengo ikastaroetako irakasleak, Airean elkarte-ko irakasleekin batera.

Ikastaroen artean aukeratu ahal izango da. Alde batetik, hasiberrientzako ikastaroak egongo dira; bestetik, gitarra jotzen dakitenentzat hobetzeko ikastaroak. Kantu ikastaro bat ere emango dute.

Rogelio Botanz eta Luis Pastorren kontzertuak

Kontzertuei dagokienez, aipagarriak dira abenduaren 27an eta 28an Antoniano aretoan Rogelio Botanz eta Luis Pastorrek hurrenez hurren emango dituzten kontzertuak.

Kontzertu gehiago ere izango dira. Raul Viela Bellosta arituko da abenduaren 26an Zarauzko udaletxean. Ikastaroetan parte hartuko duten ikasleek ere beren trebezia erakutsiko dute 29an udaletxean eskainiko duten emanaldian.

Jaialdiaren azken egunean, abenduaren 30ean, Admira Gitarra lehiaketaren sari banaketa egingo da. Goi maila eta erdi mailak bereiziko dituzte, eta bi irabazleek gitarra bana jasoko dute. Hurrengo urteko Gitarra Jaialdian kontzertua eman eta ikastaroetako irakasle izateko aukera ere izango du goi mailako irabazleak. Ikastaroetako ikasleek bakarrik parte har dezakete lehiaketan.

Ikastaroak dohainik izango dira zarautzar guztientzat. Airean elkarte-ko kideek, berriaz, %10eko beherapena izango dute.